

程

華陽國志卷第九

李特雄壽勢志

李特字玄休略陽臨渭人也祖世本巴西宕渠賔民種黨勁勇俗好鬼巫漢末張魯居漢中以鬼道教百姓賔人敬信值天下太亂自巴西之宕渠移入漢中魏武定漢中曾祖父虎與杜朴胡約楊車李黑等移于略陽北土復號曰巴人特父慕為東羌獵將特兄弟五人長兄輔字玄政次特特弟庠字玄序庠弟流字玄通流弟驤字玄龍皆銳驍有武幹特長子蕩字仲平好學有容觀少子雄字仲雋初特妻羅氏夢



雙虹自門昇天一虹中斷羅曰吾二兒若有先亡在者必大貴雄少時辛冉相當貴有劉化者道術士也言關隴民皆當南移李氏子中惟仲雋天姿竒異終為人主鄉里人多善之與叔父庠並以烈氣聞人多歸之既克成都衆皆饑餓驤乃將民入郾王城食穀芋雄遣信奉迎范賢欲推戴之賢不許更勸雄自立永興元年冬十月楊驤楊珪共勸雄稱王雄遂稱成都王追尊曾祖庸曰巴郡桓公祖慕隴西王父特景王母曰太后追謚世父輔齊烈王仲父庠梁武王仲父流秦文王兄蕩廣漢壯文公以叔父驤為太

傅庶兄始為太保外兄李國為太宰國弟離為大尉從弟雲為司徒璜為司空閻式為尚書令驤為僕射發為侍中珪為尚書洪為益州刺史徐典鎮南王達軍師具置百官下赦建元太武迎范賢為丞相從弟置流子也以不陪列誅之賢既至尊為天地太師封西山侯復其部曲軍征不預租稅皆入賢家賢名長生一名延父又名九重一曰支字元涪陵丹興人也光熙元年雄稱皇帝改元晏平永嘉三年羅羨旬琦等殺李離於梓潼時閻式去雄依離并見殺驤攻不克時李雲李璜皆戰死明年文碩殺李國以巴

西梓潼為晉平寇將軍李鳳在晉壽 梁州先已為
雄所破不守而譙登在涪平西參軍向奮屯漢安之
宜福張羅屯平無後漢書越嶲郡有會無城逼雄雄將張寶弟全
在旬琦中雄遣寶反為奸許以代離寶素凶勇先殺
人而後奔梓潼密結心腹會羅尚遣使慰勞琦琦等
出送其使寶從後閉城門琦等奔巴西雄得梓潼拜
寶為大尉雄自攻奮奮走遣驤攻登登初將驤子壽
欲以誘驤被攻急救援不至還驤壽 五年春驤獲
登遣李始督李鳳攻巴西殺文碩是歲雄姨弟任小
受張羅募手刃雄頭雄幾死改元玉衡是後扶風鄧

芝楊虎等各率流民前後數千家入蜀以鳳為征北
梁州任回鎮南南夷寧州李恭征東南蠻荊州皆大
將軍校尉刺史雄驤勤邨百姓於內鳳回恭招流民
於外稱有功氏符成隗文既降復叛手傷雄母及其
妻也咸釋其罪厚加待納皆以為將天水陳安舉隴
右來降武都氏王楊茂搜奉貢稱臣杜弢自湘州使
使求援晉涼州刺史張駿遣信交好漢嘉夷王冲遣
子入質頃之朱提審炤率民歸降建寧爨量蒙嶮委
誠其餘附者日月而至雄乃虛已受人寬和政役遠
至通安年豐穀登乃與文教立學官其賦民男丁一

歲穀三斛女丁一斛五斗疾病半之戶調絹不過數丈綿不過數兩事少後稀民多富實至乃閭門不閉路無拾遺獄無滯囚刑不濫及但為國威儀無則官無秩祿職署委積班序無別君子小人服章不殊貨賄公行懲勸不明行軍無號令用兵無部伍其戰勝不相讓敗不相救攻城破邑動以虜獲為先故綱紀莫稱 李鳳在北數有戰降之功時蕩子稚屯晉壽害其功 大興元年鳳以巴西叛驤討之久住梓潼不敢進稚自至涪驤遂斬鳳以壽代鳳以知州征事二年驤伐越雋又分伐朱提二三年獲太守西夷校

尉李釗 夏進伐寧州大敗於螳螂還 初氏王楊

茂搜子難敵堅頭為劉曜所破奔晉壽晉壽守將李稚蕩第二子也受其賂遺不送成都曜既引還稚遣難敵兄弟還武都遂即叛稚稚悔失計連白雄求伐氏稚許之羣臣多諫稚不從遣稚兄瑒以侍中中領軍統稚攻難敵由白水道壽遣田稚弟珩由陰平入二道討氏難敵等先拒壽珩珩壽不進而瑒稚徑至下辦以深入無繼大為氏所破稚瑒皆死死者千餘人稚深自咎責以謝百姓瑒蕩之元子有名望志尚稚欲傳以後嗣甚痛惜之稚妻任無子養瑒弟班為

子 雄自有庶子十五人羣臣上立嗣雄曰孫仲謀
割有江東伯符基兆子止侯爵國志耻之宣公舍子
立弟君子以為知人吾將彌縫國志之耻以繼宣公
之美驥與司徒王達諫以為不可雄不從 永昌元
年冬立班為太子驥泣曰亂始於是矣 泰寧元年
越嵩斯叟反攻圍任回及太守李謙遣其征南費黑
赦之 咸和元年夏斯叟破 二年謙移郡民於蜀
三年冬驥死追贈相國謚曰漢獻王壽以喪還拜珣
征北梁州代壽以班行撫軍將軍脩晉壽軍屯 五
年拜壽都督中外諸軍大將軍中護軍西夷校尉錄

尚書摠統如驥 冬壽率征南費黑征東任邵伐巴
東至建平監軍毋丘奧退保宜都六年春壽還遣任
邵屯巴雄以子越為車騎住廣漢 秋壽伐陰平
冬城涪縣 七年秋壽南征寧州以費黑為司馬與
邵攀等為前軍由南廣入又別遣任回子調由越嵩
冬十月壽黑至朱提朱提太守董炳固城寧州刺史
尹奉遣建寧太守霍彪大姓爨深等助炳時壽已圍
城欲逆拒之黑曰料城中食少霍彪等雖至齎糧不
多宜令人入城共消其穀猶嫌其少何緣拒之彪等
皆入城城久不下壽欲急攻之黑諫曰南道儉俗好

反亂宜必待其詐勇已困但當日月制之全軍取勝
以求有餘溷牢之物何足汲汲也壽必欲戰果不利
乃悉以軍事任黑八年春正月炳彪等出降威震十
三郡 三月刺史尹奉舉州委質遷奉於蜀壽領寧
州南夷初平威禁甚肅後轉凌掠民 秋建寧州民
毛衍羅屯等反殺太守邵攀牂牁太守謝恕舉郡為
晉壽破之 九年春分寧州置交州以霍彪為寧州
建寧慶深為交州刺史 封壽建寧王張駿使參軍
傅穎治中張淳遺雄書勸去尊號稱藩於晉雄引見
謂曰吾過為士大夫所推然本無心於帝王也貴州

將令行河沙常所希冀進思共為晉室元功之臣退
思共為守藩之將掃除氛埃以康帝宇而晉室陵遲
德聲不振引領東望有年月矣會獲來貺情在閭室
有何已已穎淳以為然使聘相繼 巴郡嘗告急云
有東軍雄曰吾常慮石勒跋扈侵逼瑯琊以為耿耿
不圖乃能舉軍使人欣然雄之雅談多如此類 三
月壽還夏六月癸亥雄疾病卒時年六十一偽謚曰
武帝廟稱太宗凡自立三十年 冬十二月丙寅葬
成都墓號安都陵也
班字世文蕩第四子也少見養於雄年十六立為太

于好學愛士每觀書傳謂其師友天水文夔隴西董融等曰吾見周景王太子晉魏太子丕吳太子孫登文章鑒識超然卓絕未嘗不有慙色何古人之難及乎進止周旋勤於咨問但性輕躁失在田獵甲子襲位玠來奔喪勸遣雒子越還江陽而欲令期代已知北事班以未葬不許遣玠還涪冬十月癸亥期越殺班於臨次并殺班仲兄領軍都弟玠奔晉期偽謚班曰戾太子壽追謚曰哀皇帝子幽顯為期所殺班兄弟五人皆兵死四人無後玠在晉歷巴郡襄陽宜都太守龍驤將軍永和三年從征西於山陽戰死

也期字世運雄第四子也母冉賤雄妻任養為子少攻學問有容觀雄時令諸子各募合部曲多者纔得數百人而期獨得千餘人為安東將軍雄亡越自江陽來赴喪兄弟快快既以班非雄所生又慮玠不利已與兄越密謀圖班太史令韓豹上言宮室有陰謀兵氣戒在親戚班不悟遂因夜哭越殺班期自立以越為相國與壽并錄尚書事進壽大都督徒封漢王使討玠於涪封越建寧王以仲兄霸為中領軍鎮南弟保鎮西西夷校尉汶山太守從兄始征東代越皆大將軍玠走即拜壽梁州知北事咸熙元年春

正月立妻閻氏為后下赦改元玉恒 秋以司隸景
騫為尚書令征南費黑為司隸班舅羅演為僕射
舅羅演與漢王相天水上官澹謀襲期立班子幽謀
泄殺澹并誅班母羅瑤子礮稚妻咎二年忌從子載
多才藝託他事誅之而霸保皆暴病死於是大臣自
疑骨肉不相親而期志益廣忽慢公卿政刑失錯
四年夏四月壽自涪還襲期假以誅越騫為言越請
散財募士格戰期謂壽不自薄不許既誅越騫初廢
期為邛都縣公 五月乃殺期及誅李始等殺兄弟
十餘人期死時年二十四謚曰幽王 五年徙其妻

子於越騫勢又使人就越騫誅其子 壽字武考有
幹局愛尚學義志度少殊於諸子雄奇之自代父為
將志在功名故東征南伐每有効事雄疾病侍疾左
右左右侍臣造雄顧命寄託於壽 期之殺班也李
始初欲附壽圖共討期壽不敢始怒說期取壽憚李
珩在北欲藉壽討之故許壽既受漢封北伐珩告以
去就利害假道故珩得由巴順水東下吳壽雖代珩
鎮涪歲終當入朝覲常自危嫌輒造漢中守將張才
急書告方外寇警 咸康二年冬北入漢中破走司
馬勲壽見期越兄弟十餘人年方壯大而手下有強

兵懼不自全數聘命高士巴西龔壯壯雖不應恐見害不得已數見壽時岷山崩江水竭壽緣劉向之言而惡之每謀壯以自安之術壯之父及叔皆為特所殺欲假手報讎未有其由因說立事何如舍小從大以危易安開國裂土長為諸侯名高桓文勲流百代矣壽從之陰與長史略陽羅恒巴西解思明共謀據成都為晉稱藩會養弟攸從成都病還死道中乃佯言越藥殺之又詐造妹婿任調書言期越當廢壽以惑羣下羣下信之乃誓文武許賞城中資財得數千人南攻成都子勢為開門內應遂獲期越誅其宗族

十餘人兵入虜掠民家奸淫雄公主及李氏諸婦多所殘害數日廼定恒與思明及李弈王利等勸壽稱鎮西將軍益州牧成都王以壯為長史告下又勸令送期於晉任調與司馬蔡興侍中李艷及張烈等勸壽自立壽亦生心遂背思明所陳之計稱漢皇帝尊父驤曰獻帝母咎氏曰太后下赦改元漢興以恒為尚書令思明為廣漢太守任調鎮北梁州知東羌校尉李弈鎮西西夷校尉更代諸郡及卿佐皆用宿人及巴叅佐省交州以從子權為鎮南南夷寧州於是成都諸李子弟無復秉兵馬形勢者雄時舊臣及六

郡人皆斥廢也 秋七月李弈從兄乾與大臣合謀
欲廢壽壽懼使子廣與大臣盟要為兄弟進李閔為
征東荊州移鎮巴郡 八月天連陰雨禾稼傷損百
姓饑疫草莽臣龔壯上封事曰臣聞陰德必有陽報
故于公理獄高門待封伏惟獻皇帝寬仁厚惠宥罪
甚衆靈德洪洽誕鍾陛下陛下天性忠篤愛遺建節
志齊周霍誠貫神明而志緒違理顛覆顧命管蔡既
興讒諛滋蔓大義滅親撥亂濟危上指星辰昭告天
地軟血盟衆舉國稱藩天應人悅白魚登舟霆震助
威烈風順義神誠允暢日月光明而論者未喻權時

定制淫雨汜濇垂向百日禾稼損傷加之饑疫百姓
愁望或者天以監示陛下又前日之舉止以救禍陛
下至心本無大圖而今久不變天下之人誰復分明
知陛下本心者哉且玄宮之讖難知而盟誓顧違一
旦疆場有急內外騷動不可不深思長久之策永為
子孫之計也愚謂宜遵前盟誓結援吳會以親天子
彼必崇重封國歷世雖降階一等永為靈德宗廟相
承福祉無窮君臣銘勲於上生民寧息於下通天下
之高理弘信慎之美義垂拱南面歌詩興禮上與彭
韋爭美下與齊晉抗德豈不休哉論者或言二州人

附晉必榮六郡人事之不便昔豫州入蜀荆楚人貴
公孫述時流民康濟及漢征蜀殘民太半鍾鄧之後
放兵大掠誰復別楚蜀者乎論者或不達安固之基
惜其名位在昔諸侯自有卿相司徒司空宋魯皆然
及漢藩王亦有丞相今義歸彼但當崇重豈當減削
昔劉氏郡守令長方仕州郡者國亡主易故也今日
義舉主榮臣賴寧可同日而論也論者又謂臣當為
法正陛下覆臣如天養臣如地恣臣所安至於名榮
漢晉不處臣復何為當佯法正論者或言晉家必責
質任及徵兵伐胡何以應之案晉不煩尺兵一國來

附威卷四海廣地萬里何任之責胡之在北亦此之
憂今平居有東北之虞縱令徵兵但援漢川猶差二
門耳臣託附深重忘疾病之穢實感殊遇冀以微言
少補明時常懼殞歿不寫愚心辜負恩顧謹進慳慳
伏願罪戮壽不悅然拘前言秘藏之 九月僕射任
顏雄妻弟也謀反誅并殺雄子約等 五年春二月
晉將伐巴郡獲李閔閔恭子也初受許自牛鞞以東
土斷與閔執政者以為不可乃止復不益兵故覆沒
閔弟豔以是怨故與朝右有隙是時壽疾病恒思明
等復議奉晉計尋巴郡破壽以為附晉晉當以兵威

故不能自斷遂輟計 三月拜李奔鎮東代閑 夏

建寧太守孟彥率州人縛寧州刺史霍彪於晉舉建

寧為晉遣右將軍李位都討之時權在越嶲 秋又

遣尚書廣漢李攄為御史入南中攄祖毅晉故寧州

刺史以向與南人有舊故遣之攄從兄演自越嶲上

書勸壽歸正返本釋帝稱王壽怒殺之車騎將軍王

韜為參軍右車騎將軍王韜為參軍九字前後文不
相屬不知記何事也今仍舊本存此九字

於後以 晉康帝建元元年壽卒勢立改元太和太史令韓皓

上言熒惑守心乃宗廟不修之譴勢乃更命祀成始

祖太宗皆謂之漢勢之弟大將軍廣以勢無子求為

太弟勢不許馬當辭思明固請許之勢疑與廣有謀

收當思明斬之廣自殺思明被收歎曰國之不亡以

我數人在也今其殆矣思明有智略敢諫諍馬當素

得人心及其死士民無不哀之冬李奔自晉壽舉兵

反單騎突門門者射殺衆潰勢大赦境內改年嘉寧

勢驕淫不鄙國事中外離心蜀土無獠魯皓切西
南夷別族至

是始從山出自巴至犍為梓潼布滿山谷大為民患

加以饑饉境內蕭條三年春二月桓温伐蜀軍至青

衣勢大發兵遣督堅等將之督子感也自山陽趣合水

諸將欲設伏江南以待晉兵外堅不從引兵自江北
駕鴛鴦渡向捷為渠温自將步卒直指成都
外堅至捷為乃知與温異道還自沙頭津濟北至温
已軍於成都之十里陌堅衆自潰勢悉衆出戰于笮
橋笮音昨中書監王嘏散騎常侍常璩勸勢降勢乃夜
開東門走至葭萌使散騎常侍王幼送降文於温勢
至建康封歸義侯

李氏自起事至亡六世四十七年正僭號四十三年
蜀中亦有恠異期時有狗豕交木冬榮勢時涪陵民
樂氏婦頭上生角長三寸凡三截之又有民馬氏婦

姪身兒脇下生其母無恙兒亦長育有馬生駒一頭
二身相着六耳一牡一牝又有天雨血於江南數畝
許李漢家舂米自臼中跳出遂斂於箕中又跳出寫
於簞中又跳出有猿居鳥巢至城下地仍震又連生
毛其天譴不能詳也

譔曰特流乘釁險害雄能推亡固存遭皇極不見遇
其時與期倡為禍階而壽勢終之詩所謂亂離瘼矣
爰其適歸者也長老傳譙周讖曰廣漢城北有大賊
曰流曰特攻難得歲在玄宮自相賊終如其記先識
預覩何異古人乎歷觀前世偽僭之徒縱毒虔劉未

有如茲每惟殷人丘墟之歎賈生過秦之論亡國破家其監不遠矣

按常璩華陽國志目錄第九卷及序志皆云述李特雄期壽勢志則先固有志也今諸本皆無之意者傳寫脫漏因循不錄遂失之爾今本諸通鑑所述叅以載記所書續成勢志用補其闕以俟後之博洽君子云又史載散騎常侍常璩實勸李勢降桓温璩必作志者因續記此云

華陽國志卷第九

